

Un Anochi Literario exitoso

STA. CRUZ -- E patio di Fort Zoutman tabata completamente yen di amantenan di nos cultura cu a bin Diabierna anochi pa ta parti di e anochi literario organiza pa Fundacion FUNDARTE.

Un actividad durante cual tur aspecto di nos cultura a keda presenta pa artistanan excepcional di Aruba.

E meta principal di anochi tabata pa promove literatura na unda diferente persona a recita poesia y proza, intercambia cu musica, danza y canto, mientras a duna reconocimiento pa 3 persona cu a engradece nos cultura: sra. Nydia Ecury, sr. Chido Quilotte y sra. Burny Every dfm.

E declamacion tabata na encargo di Rosabelle Illes, Mayra Lopez, Diana Antonette, Ruthy Vrieswijk y nos poeta stima sra. Nydia Ecury. Algun poesia a ser

dramatiza pa e excelente bailarinanan Alydia Wever y PierAngeli Wever, kendenan a demostra nan nivel halto di baile. Algun alumno di Skol di Danza “Diana Antonette” a duna un presentacion sublime. Nos tan famoso actriz Faritah Luidens a percura pa un escena di e conocido “one-woman show” di sra. Nydia Ecury: Luna di Papel y a deleita e publico cu algun cancion di nostalgia antaño compaña riba piano pa sr. Fred Dirksz, sr. Fons Geerlings riba guitarra.

Coro Melange bAO direccion di sra. Maybelline Arends-Croes deleita e publico cu varios cancion y un bunita duo a canta e famoso melodia di e musical “Beauty & the Beast”.

Presentacion di e harpista sr. Edgar Kelkboom hunto cu e cuartista Doodle Sophia cu compañamento di

Mario Middendorp y Ebby Peterson. Un elenco di artista cu e caliber pa presenta un anochi sublime.

Mester admiti sinembargo cu e preparacion di varios luna di FUNDARTE pa presenta e anochi aki y e esfuerzo di e artistanan pa duna un presentacion excelente, a ser dificulta grandemente pa e persona encarga cu sonido y iluminacion e anochi aki, pero e profesionalismo y calidad di esnan cu a presenta, a sa di surpasa e fayó aki. Pa e fayó di e persona aki, FUNDARTE pa pidi un disculpa na e artistanan cu a “sufri” na su man!

FUNDARTE a acerca un di e miho companianan profesional na Aruba, pa garantiza e mihor sonido y iluminacion posibel. Un compania cu pa hopi aña tabata envolvi den shownan grandi den hotelnan na Aruba. Tabata un sorpresa

ora un persona desconoci pa FUNDARTE, a presenta y a laga sa cu e ta na encargo di sonido y iluminacion. E tabata dispone di 10 microfon y ekiponan sofisticada, pero no tabata tin e habilidad pa maneha nan. El’a demostra di no tin conocimiento di e ekiponan y tampoco afinidad pa cu cultura Arubano. El’a perhudica e prome parti di e programa grandemente y ta te ora cu a yama e doño pa reclama e situacion, esaki a presenta inmediatamente na Fort Zoutman pa percura pa e segundo parti continua miho.

Un aspecto espontaneo durante e programa tabata ora 3 hoben kendenan tabata den publico a acerca e maestro di ceremonia cu e suplica pa duna nan un oportunidad pa declama bao di e nomber “Young Poets”.

FUNDARTE ta spera cu e hobennan aki continua

riba e tereno di literatura y sigui prepara nan mes riba e aspecto di presentacion y declamacion.

Apesar di e fayó di sonido y iluminacion durante e prome parti di e anochi, FUNDARTE a ricibi hopi bon reaccion di un gran cantidad di persona e anochi aki, mientras un corant cu ta sali tur dia na Ingles a comenta lo siguiente di e anochi “a delightful evening of all the cultural arts that entertained and enlightened” y tambe:

“a bill that touched on every form of the cultural excellence that Arubians have produced: it was truly a moving evening of great literature, music and dance”. Un danki GRANDI na tur e artistanan cu a coopera. FUNDARTE ta gradici tur esnan kende a asisti na a bunita anochi aki y tambe tur instancia cu a coopera.